



# Tir Yimyim

www.tiryimyim.in

Regd. No. RNI. NAGAAO/2004/13113. Postal-NE/RN-717.

e-mail : tiryimyim@gmail.com


TAPAK 8

Yangia anidakangma : Tir Yimyim

tir\_yimyim

tir yimyim

TAPAK 7



**FIFA-i Club World Cup 2025 asayatsüba tesemtem sangdongogo**

**Nasrallah tepsetba sülen Israel-i ano Lebanon nung tesem balala amak**

VOL. XXI ISSUE NO. 348 (ADOK 348) DIMAPUR TENTONÜ (MONDAY) RONGJUI (SEPTEMBER) 30, 2024 ₹ 5.00

## Nagaland International Coffee Seminar 2024 amongtsü

**Dimapur, September 29, 2024 (TYO):** October 1 nungi Hotel Acacia, Dimapur nung anogo ananü Nagaland International coffee Seminar 2024 agitsü.

Iba sentong ya Business Association of Nagas (BAN) aser Ministry of Micro, Small and Medium Enterprises (MSME) ajanga ayongzükür aser Nagaland nung coffee production tajungba akümstü nükjiong nung agitsü.

Sentong nung Joint

Secretary, MSME, Government of India Mercy Epao aser Lok Sabha MP S. Supongmeren Jamir nati o jembitsü.

Shisatokden sentong nung international experts-i Nagaland nung coffee industry melenshia aruba aser ajungkettsü atema shisalen sayutsü.

Iba sentong nung global coffee experts nungi aika angazüktsü aser külen Nagaland nung coffee cultivation lenmang sadema aliba sayutsü.

## NPCC-i Advisor Imkong onük meyiptsür

**Dimapur, September 28, 2024 (TYO):** September 28, 2024n nü Kohima nung nashi metepsettsü atema sentong ka agitsü aliba dak sendakba nung MLA & Advisor Imkong L Imchen-i kuli kecha melii Congress aitsüba atema aoksar ta Nagaland Pradesh Congress Committee (NPCC)-i ashi.

Congress-i September 10, 2024 nü sangdong ka ajanga "Gau Dhvaj Sthapana Bharat Yatra" aitsüba metetdaksüogo anungji Advisor Imkong-i kulitem repringdang asübo jungla. Tanabuba nung pai onok

aitsüba meyiptsütsü nungdak madoker kechiyong kuli kecha mali, ta Communications Department, NPCC-i ashi.

Iba linük nung alirtem taginüba atema onoki olemteptsü renema dang lir saka kuli aser tamendakdak shitak alitsüla, ta parnoki ashi.

"Onoki Gau Dhvaj khukhua aitsür aser iba sentong ya asen Constitution nung lateta aliba onüktem anema lir ta onoki züngshir. Ibala telemsa adoktsüsa inyakba mapatem anema onoki raratsü" ta NPCC-isa metetdaksü.

## DMC telongtet merükmejua mongogo

**Dimapur, September 29, 2024 (TYO):** Dimapur Municipal Council (DMC) kübok ward 23 nung merükmejuba maparen ajungkettsü nükjiong nung September 28, 2024 nü lokti nübodoka mapa inyakogo.

Swachh Bharat Mission 2.0 kübok Swachhata Hi Seva 2024

campaign nung shilem ka ama DMC-i iba sentong ayonga agi.

Yashinep 6:00 ako nungi ward councillors, colony chairmen, Gaon Buras (GBs), youth organizations aser NGOs den kiyongertemi lokti nübodoka inyakba mapa nung shilem agia liasü.

## Chuchuyimpang yimtak gari lendong nung ka 1 asü



**Mokokchung, September/Rongjui 29 (TYO):** Chuchuyimpang yimtak September 28 anogo anüngdang teroto 12 ako meta Van gari ka nung kinüngtsü aser kinüngbo na tejaklen amen aser tanur tetsür chanu ka aser tebur chanu ka ta tesülen mener accident asü aser iba lendong nung kinüngtsüji yangji atanga asü.

Gari ya atang leni aluba mapang gari nungji timtem ka

adoka atanglen jagi lur Chuchuyimpang yim leper anasa anisüngzüktsü ki süa aliba nung tsükdakba agi gariji lenkübokleni melui anendak gari meküpdaka ayu.

Iba lendong nung kinüngtsü tekolak kanga mejungi yirua yangji atanga asü aser kinüngboa kanga mejungi yiruba agi Dimapur bushia bener oagi mozüki nung anepaludagi saka tanur anajibo kecha meyiru junga lir.

## President Droupadi Murmu-i Bharatiya Kala Mahotsav tenzüktsüogo



**Guwahati, September 29, 2024 (Agencies):** President Droupadi Murmu-i Honibarnü (September 28) Rashtrapati Nilayam nung mezüngbuba Bharatiya Kala Mahotsav tenzüktsüogo.

Anogo 8 nü bejungmong ya Rashtrapati Nilayam, Ministry of Development of the North-East Region (DONER) aser Ministry of Culture külemi ayonga amonger.

North-Eastern state tem sobaliba senmang ajungkettsü atema iba benjung amonger aser Arunachal Pradesh, Assam, Manipur, Meghalaya, Mizoram, Nagaland, Sikkim o Tripura nungi shilem balala agir.

"Asen linük nung sobaliba takar kümzüka ayutsübaji asenok ajak külem tebilemtsü khuret lir. North-Eastern state tem nungi yartsüngsang, kentenmenü, art aser subsolemtsü ajanga asen linük nung temeyoktep shisangtsür" ta President Murmu-i ashi.

India nung alirtemi North-East sobaliba aser nisungtem tali meteta akümstü nükjiong nung iba Mahotsav amonger, ta lai ashi.

"Iba Mahotsav ya North-Eastern sobaliba sayuba dang masü saka India nung North-East aser southern regions tali sendakteptsü atema maangka ka lir. Iba sobaliba benjung ajanga

North-East nungi artisans aser artists tali tashi itshitsü imlar" ta President Murmu-isa shisem.

Iba benjung tenzükba sentong nung Telangana Governor den North-Eastern state ajak nungi Governor tem, Union Minister for Culture and Tourism aser Minister of State for DONER nunger aden.

September 29 nungi October 6, 2024 tashi anepdang 10:00 ako nungi aonung 8:00 ako tashi iba benjung semdangtsü akok.

Tejangrartemi <https://visit.rashtrapatibhavan.gov.in> nung book asütsü akok mesüra walk-in bookings lir.

## Myanmar aser NSCN-Angmai ceasefire atema tebilemtsü abener

**Dimapur, September 29, 2024 (TYO):** Myanmar sorkar aser NSCN-Angmai group tsüngda ceasefire agreement agitsüba mapa nung taittsü keta lir Yung Aung-i aniba National Socialist Council of Nagaland (K) (NSCN-K)-i metetdaksüogo.

Myanmar sorkar aser NSCN-Angmai tsüngda tawa kanga tesentaktep tajung yur inyaksangshia arur. Parnok tsüngda kechi tenangzüktep agidir agiaka ibaji Naga nunger aginüba yimten taginüba masü ta NSCN-K-i ashi.

"NSCN-Angmai-i yimtenren

tsütsü tangatetba tejangja malio anungji parnoki Naga nunger tenüng nung noktaksü makok. Parnoki Myanmar sorkar den kechi tangatetep kati arudir ibaji parnok tsüngda atema dang asütsü kechiyong Naga nunger taginüba atema onoki dang shitakba noktaker" ta NSCN-K-isa ashi.

Myanmar sorkari NSCN-Angmai den yaritepba aitsür aser iba ya züngdoka aliba telok ka nem temeten agütsüba ama lir. Iba telok ajanga eastern Naga nunger longjema aliba nung lendong bentsür arutsü kechiyong parnoki nübortem mashileni anir, Naga

area melenshitsür aser ali rongsen agitsü bilemer, ta NSCN-K-isa ashi.

Parnokisa Myanmar sorkar dang eastern Naga regions nung mepetmesü adokdaksütsü atema NSCN-Angmai mamshitsü ayongzükogo.

India-i Naga nunger rongnung telemsa adoktsü atema mapa inyakba ama Myanmar-i meinyaktsüla kechiyong iba ya aibelen tulu ka lir. Myanmar linük nung mepetmesü adoka aliba nung NSCN/GPRN mesüra Naga nunger manioktsü nenshir ta NSCN-K-isa ashi.

## NSCN (Khango)-i aonung tesü inyaksangshiba noktanger

**Dimapur, September 29, 2024 (TYO):** Dimapur nung aonung tesü yimya tamajung benshiba azüoktsü aser tensa tiptema ayutsü atema NSCN/GPRN (Khango)-i tenokdangba ka agütsüogo.

Iba tenokdangba ya nightclubs, pubs, lounges, restaurants, hotels aser iba mesükba tesemtem atema agütsür aser aonung 10:00 ako nung shibangtsüla ta NSCN/GPRN (Khango)-i sangdong kanung ashi.

Aonung tesü ibala inyakyim

ajanga lokti asoshi timtem bentsür arur ta public aser civil society organizations-i ashiba nung ajemdaker iba tenokdangba agütsür.

NSCN/GPRN (Khango)-isa yimya tamajung benshidak uniform nung kaketshirtem dena tanurtem kazüba atema tebilemtsü abenba metetdaksüogo.

Parnokisa iba maparen nung tenük yoktsü aser sendaktepa alir ajaki iba tebilemtsü azüoktsüba nung yariteptsü ayongzükogo.

NSCN/GPRN (Khango)-isa Dimapur aser temeket nung

benjung mapang firecrackers amshiba noktanga metetdaksüogo.

Firecrackers amshiba ajanga temang nung timtem agütsür, lipoküm menentsür aser noise pollution lir. Temang nung timtem alirtem kümzüka ayutsü aser tatidang agütsüba kaketshirtem meinprong masütsü atema iba tenokdangba agütsür, ta NSCN/GPRN (Khango)-isa ashi.

Iba tetuyuba alema inyakerem Yehzabo nung lateta aliba temerenshi alitsü ta parnokisa ashi.



# Niuland nung PMFME scheme indang senden ka amen



Niuland nung PMFME scheme indang senden amendang tangokba noksa angur.

**Dimapur, Rongjui/Sept. 29 (TYO):** Pradhan Mantri Formalisation of Micro Food Processing Enterprises (PMFME) Scheme atema lokti tentet balala senden ka September 27, 2024 nü Town Hall, Niuland nung mena liasü.

Iba senden ya Deputy District nung project mapa

kuma inyaksü asoshi telemtetba balala agitsü atema stakeholders aser sendaktepa department nem angatetdaksütsü aser PMFME Scheme tashi itshidaksütsü nükjidong nung iba senden mena liasü.

Iba senden ya Deputy Commissioner & Chairman,

DLC Niuland lenisüba kübok District Industries Centre, Niuland aser State Nodal Agency (SNA) züngsem temi lungiemer ayongzüka liasü.

Iba senden nung Functional Manager, Niuland, Itsato zhimomi menden liasü aser ADC Niuland, Athasangla dena liasü.

# PHED-i SHS 2024 nung shilem ka ama maparen balala inyak

**Dimapur, Rongjui/Sept. 29 (TYO):** Linük tesem ajanga nung tang teinyakdak Swachhata Hi Seva (SHS) 2024 campaign nung shilem ka ama Public Health Engineering Department (PHED), Rural Division Dimapur ajanga mürekmejutsü aser nüburtem nem shilem agidaktsütsü nükjidong nung September 27 & 28, 2024 anogotem maparen balala inyaka liasü.

Department ajanga Government High School (GHS), Kuhuboto nung SBM Drawing Competition ayongzüka, Kuhuboto market area nung mürekmejuba aser

süngdong-lidong atemba sentong ka ayongzüka aser Rural Division Dimapur kübok Cleanliness Target Units (CTUs) ka ama shima liasü.

Iba mürekmejuba sentong nung lokti tentet balala, lanurtem aser shishilempar temi shilem agia Kuhuboto market area tajungba kumdaktsüba nung shilem agia liasü.

Iba den külemi September 28, 2024 nüa PHED Urban Division kübok Darogapathar aser Thilixu yimtsüngtem nung mürekmejuba sentong ayongzüka liasü.

Iba anogo GHS Kuhuboto nung "Clean Niuland of my Dreams" omen nung

ajemdaker SBM Drawing Competition ayongzüka, kong kaketshir temi tejangraba tulu nung shilem agia liasü.

Iba tetoktepba nung takok angurtem ya Class 10 nung azünger Pulo-i mezüngbuba jenjang, Class 10 nung azünger Aniket-i tanabuba jenjang aser Class 8 nung azünger Zajamo-i tasembuba jenjang nguteta liasü.

Iba mapang GHS, Kuhuboto- A indang Head Teacher-i Swachhata Pledge ketdangsüa agi aser Linoka Zhimomi, IEC Consultant Rural Division, Dimapur ajanga "Swachhata" onük nung o tatsüka jembia liasü.

# C-Edge College NCC Cadets temi merükmeju sentong agi



**Dimapur, Rongjui/Sept. 29 (TYO):** Ato Kilonser-i October 2, 2014 nung tenzüka Swachh Bharat Mission küm 10 ajungba nüngtem nung linük tesem ajungalen nüburtemi shilem agia arur. Iba maparen ya September 17, 2024 nung tenzüka aser October 1 nü atemtsü aser iba sülen October 2, 2024 nü Swachh Bharat Diwas (SBD) agitsü.

"Swachh Bharat Diwas" tenzüker ama C-Edge College indang NCC cadets temi September 28, 2024 nü

Cleanliness and Tree Plantation Drive ka agia liasü.

Libajen asoshi awareness agütsütsü aser community service temaba jenjangi ajungkettsü nükjidong nung ayongzüka sentong nungya cadets 28 dena liasü.

Iba cleanliness drive ya collage gate nungi tenzüka aser Chathe River Bridge tashi inyaka liasü. Aji metenzükdang cadets tem college nung adenshia mapa lema liasü. Iba mapang kija aser Naga United

Village Council ajanga aser süyi-sübonger temi tajemtsü tzü, juli aser juice agüja liasü.

Cadets temi iba mapang Naga United Village nungi plastic jana aser shisa aoba jana saks 21 sünga bendena liasü.

Mapang tatsüka anisüngzüka sülen cadets temi süngdong-lidong atemba mapa tenzüka liasü. Iba mapang College indang principal, Dr. Chubatola Aier-i tenlaga süngdong 20 parnoki campus temeket nung atem.

# SCERT-i N-TET atema metetdaksür

**Dimapur, Rongjui/Sept. 29 (TYO):** State Council of Educational Research and Training (SCERT) ajanga 4 buba Nagaland Teacher Eligibility Test (N-TET) September 23, 2024 nü agitsü.


Iba tatidang, syllabus, eligibility criteria, examination fees aser tongtipang anogotem indang osang tejangja N-TET official website nung agüja lir aser tejangrar temi SCERT website <https://scert.nagaland.gov.in> nungi

information Bulletin agizüka kanga junga azüngtsü ayongsüker, ta SCERT sangdong ka ajanga ashi.

Candidate temi SCERT website <https://scert.nagaland.gov.in> nung online ajanga dang apply asütsüla. Online application ya September 28, 2024 nü tenzüko aser October 16, 2024 tashi alitsü.

Iba sülen application kata magizüktsü, ta sangdong ajanga ashi.

# Dr. B. Henshet Phom-i JASAS mundang nung shilem agi



**Dimapur, Rongjui/Sept. 29 (TYO):** National Museum of Ethnology, Osaka nung September 28, 2024 nü Japanese Association of South Asian Studies (JASAS) indang mungdang alidang Yingli College indang Vice Principal, Dr. B. Henshet Phom-i "The basic religious concept of the Phom

Naga tribe of Nagaland" onük nung paper presentation ka agüja liasü.

Iba sentong nung Dr. N Nyejat Konyak-i "Politics of salt trade between Eastern Nagas and the valley kingdom in pre-colonial of Northeast India" indang paper presentation agütsü.

Osaka, Japan nung September 28 & 29, 2024 anogotem international paper presentation atema ICSSR ajanga la indang travel grant sponsor süa liasü.

La ya Tokyo University of Foreign Studies, Japan nung Post Doctoral candidate ka lir aser Assam University, Diphu Campus, Assam nung tang Guest faculty ka lir.

# Assam Rifles-i Kohima Orphanage & Destitute Home tenzüka anogo amung



**Dimapur, Rongjui/Sept. 29 (TYO):** Nüburtem lenmang balala nung maneni yara ajungketba nung shilem ka ama Assam Rifles temi Kohima Orphanage and Destitute Home indang Foundation Day munga liasü. Iba sentong ya Maj Gen Manish Kumar, SM-i moatsü aser Kohima Orphanage and Destitute Home ajanga region nung tajemzüka tia nung aliba tanurtem asoshi anibelen mesasai inyakba asoshi temlung asüba lemsatapa liasü.

Iba sentong nung jembidang paia Assam Rifles temi akhi mapang nungi nübur ajungtsü asoshi inyakba otsü lemsatapa liasü.

Iba mapang Assam Rifles

temi kaket, aben-süoshi, senotsü aser chiyongtsü aser anogoshi amshiba osettsüset tem tanur nem agüja tanurtem shisaliok nung temlung agütsütsü aser anema alitsü asoshi mürekmejia alitsü ajungshia liasü.

Item tanurtem tajungtiba nung anitettsü asoshi nüburtemi yaritsü kanga tongtipang lir, ta Maj Gen Manish Kumar-i ashi.

Assam Rifles tem region nung security agütsütsü asoshi inyakba kisüing masü saka nüburtem lenmang balala nung yaritsü asoshi shilem agia inyaker.

Iba sentong ya ajanga Assam Rifles temi Kohima nung tanurtem tarutsü jenjang tajungba kumdaktsütsü asoshi temlung agüja inyakba sayur.

# Kin High School Dimapur nung WEHD amung

**Dimapur, Rongjui/Sept. 29 (TYO):** Assam Rifles temi September 26, 2024 nü Kin High School, Dimapur nung World Environment Health Day munga liasü aser iba mapang Swachhta drive ka ama awareness lecture agütsüba den külemi süngdong tema liasü.

Iba sentong tenzüka libajen wazüka ayuba aser ibaji ajanga

meimchir takum nung kongshiba onük nung lecture agütsü.

Iba sentong nung kaketshir 160, tesayur 10 aser Assam Rifles nungi sepaitem dena liasü.

Iba sülen parnoki school aser temeket mürekba sentong ka ayongzüka aser süngdong tema kaketshir nem libajen wazüka ayuba indang angazükdaksü.





September 29, 2024 nü Hyderabad nung World Heart Day anogomong nungtem nung temelungertemi kilometer 3 jajadang tangokba noksa nung angur. Iba sentong ya Cardiological Society of India (CSI)-i ayongzüka liasü.

**Election nüboyim sentong ka nung tejembidak mapang Kharge shirang**

**New Delhi, September 29 (Agencies):**

Amongnü Jammu & Kashmir kübok Kathua nung Congress Tir, Mallikarjun Kharge-i election nüboyim sentong ka nung tejembidak mapang nung ajungbena pa shiranga aita liasü.

Tesülen pai Bharatiya Janata Party (BJP) aser Ato kilonser Narendra Modi aija, “Ato kilonser Modi menden nungi matsüngdok tashi ni taküm alitsü,” ta ashi.

Jammu & Kashmir nung assembly election shilem tasembuba agitsü mapang ana

nung lia Kathua nung nüboyim sentong ka nung jembidang pa ajungbena tangu sashiba tsütsü timtem adok. Idangyongjisa Congress party nung inyakertemi pa anepalua yari.

Arrshi küm 82, Kharge-i tzü tera ajemba sülen pai maneni asentenshir onük jembi, ajisüaka pai mapang tatsüka dang jembia liasü.

Tesülen Kharge-i, “State jenjang tanaben agütsütsü atema onoki raratsü. Ni arrshi küm 83 tain lir, saka ni kerabosa masütsü. Ato kilonser Modi menden nungi magien tashi ni taküm alitsü,”

ta ashi.

Jammu & Kashmir nung assembly election shilem tasembuba aser tatembangbuba October 1 nü agitsü. Iba election atema nüboyim Amongnü (September 29) tembangogo.

Jammu & Kashmir nung assembly elections mezüngbuba shilem September 18 nü agi aser tanabuba shilem September 25 nü agia liasü.

Election shilem tasembuba nung candidate temi menden 40 atema tokteptsü aser item menden rongnung 24 bo Jammu division nung lir.

**Hezbollah lenir asüba atema Mehbooba Mufti-i sentong thinen: BJP**

**New Delhi, September 29 (Agencies):**

Hezbollah lenir Hassan Nasrallah tepsetba anema Amongnü People’s Democratic Party (PDP) Tir, Mehbooba Mufti-i election nüboyim sentong thinenba asoshi BJP-i la sashia aitsüogo.

Amongnü BJP national otongdar, R P Singh-i, “Lai election nüboyim thinenba ajanga lai kiralongrartem asüba atema la nüktzü aluba sayuogo,” ta aitsü.

“Kiralongrartem dang ‘taküm tenla agütsürtem’ ta ajabaji la yimya lir. Taoba mapang nunga lai Burhan Wani atema-a ajep,” ta pai metetdaksü.

Singh-isa, “Sonia Gandhi-ia Batla House nung tepsetba kiralongrartem atema nüktzü alua liasü. Votebank atema

INDIA teloktep nung lenirtem ajaki yamajisa inyaker. Parnok atemabo linük tama masü,” ta metetdaksü.

Honibarnü Mehbooba Mufti-i, Palestine aser Lebanon nung pusema lai nüboyim sentong thinen, ta sangdonga liasü.

“Lebanon aser Gaza nung taküm tenla agütsürtem, talisa Hassan Nasrallah atema mangyima asüng (Amongnü) ni nüboyim sentong thinen. Tang ama mangyimba mapang ka nung onoki Palestine aser Lebanon nung atema bilemstür,” ta lai X ajanga metetdakja liasü.

Taoba mapang Deputy Chief Minister aser BJP lenir, Kavinder Gupta-ia Mufti-i Nasrallah atema mangyimba

aija, “Nasrallah ama kiralongrar ka asüba atema Mehbooba Mufti-i kechiba tebilemstü akar? Bangladesh aser Pakistan nung Hindu nungertem tepsetba mapang nungbo parnoki ola madoki liasü,” ta metetdaksü.

Gupta-isa, “Israel amakertem süogo, aser asürtem rongnung commander tem densema lir. Ajisüaka lai kiralongrartemji pusema election nüboyim thinen. Ibaji tiyazü nüktzü aluba lir. Parnok nükjidongji nüburtemi meteta dang lir. Lai inyakbaji ajanga lai voters dang nungi taochi mangutsü,” ta ashi.

Israel sepaitemi Lebanon nung Hezbollah kiralongrar telok nung tongti lenir, Hassan Nasrallah densema lenir kar tepsetgo.

**Jamaica Ato kilonser Andrew Holness-i India semdangtsü**

**New Delhi, Rongjui/ September 29 (Agencies):**

Hombar nungi tenzüka Jamaica Ato kilonser Andrew Holness-i anogo pezünü India semdangtsü aser iba mapang nungji India aser Jamaica na tsünga shishilembaba aser investment densema lenla aika nung tesendaktep tajungba akümtsü atema jembitsü, ta Amongnü ketdangsertemi metetdaksü.

Tang mezüng Jamaica nung Ato kilonser kati India semdangtsü.

Alima sabang balala nung senden amenba mapang Ato kilonser Narendra Modi aser Holness na aiben ajurutepogo, ajisüaka pai India bo tang ang mezüng semdangtsü.

Ministry of External Affairs (MEA)-i sangdong ka ajanga, “Pai semdangba ajanga linük ana tsünga tesendaktep

tajungba akümtsü, rongsenkettüng tsütsü amalitep jenjang tajungba akümtsü aser akhidang nungi Jamaica aser India na tsünga tesendaktep aliba jenjang ano tajungba akümtsü imlar,” ta metetdaksü.

Holness leniba nung ketdangsertemi Ato kilonser Modi den senden amentsü aser parnokisa linük Tir Droupadi Murmu aser tatong tir Jagdeep Dhankhar nata ajurutsü.

“Ato kilonser Holness-isa tongti ketdangsertem ajurutsü aser shishilembaba aser industry nung lenirtem den sensaksemstü atema-a maongka angutsü,” ta MEA-i metetdaksü.

Jamaica Ato kilonseri India semdangba mapang nung linük ana tsünga tezüngzüktep kar agitsü imlar, ta MEA-isa metetdaksü.



September 29, 2024 nü Chennai nung DMK lenir, Udhayanidhi Stalin-i Tamil Nadu Deputy Chief Minister tenangzüka agitsü jakdang tebou, M. Karunanidhi'er ki tama semdangba mapang tangokba noksa nung angur.

**Dhaka nung Indian High Commission-i visa services anenogo**

**New Delhi, September 29 (Agencies):**

Bangladesh yimtiba, Dhaka nung aliba Indian High Commission anema longkak aitba aser email ajanga amokmerenba sülen Bangladeshi visa applicants indang passport 20,000 dak tema meyipa agütsüogo.

Indian High Commission-i Bangladesh nungertem atema visa services ajak mapang kecha telatet makai anentsüogo.

India sorkar ketdangsertemi ashiba agi, kanga rongdak nungdakba visa application noklang kar dang agizüka lir, aser itemji medical, kaketshirtem aser double entry visas dang lir.

Bangladesh nung tesüiba ita ishika longkak aita aruba sülen taoba ita Bangladesh nung Sheikh Hasina-i aniba sorkar chirepogo, aser iba mapang nungjagi Indian visa application centres aika shibangogo, ibayongji applicants indang passports aika Dhaka nung aliba Indian High Commission ket nung liasü.

Visa application agütsürtemi tejashi nung Indian High Commission dangi email aika yoker aser karibo Commission office raksatsütsü-a

amokmerener.

Bangladesh nung Indian High Commission aser Indian consulates pezü lir aser 2023 küm kija nunga Bangladesh nungertem nem visa lakh 16 agütsü liasü. Bendanger teimtibai India semdangbaji Bangladesh nungertem lir.

Yaküm Bangladesh nung nem visa lakh 16 aser medical visa lakh 4.5 agütsü liasü. Taküm-a August ita tashi nung India-i Bangladesh nung nem visa lakh 8 agütsüogo, aser iba nungji medical visa lakh 2 densema lir.

Sorkar osang ka ajanga ashiba agi, “August 5 nungi tenzüka visa magütsür. Staff tem ishika dang akümba den külemi tang tensa apir visa magütsütsü atema telemteba agiogo. Medical kuli densema kanga rongdak nungdak atema dang agütsütsü, iba dak alia tanga linük semdangtsü atema India-i arutsüpurtem nem dang visa agütsütsü,” ta metetdaksü.

Bangladesh nung diplomatic missions amenoktsü atema Europe nung aliba linük kar densema linük aika nem temelaba magütsür, anungji item linüktem semdangtsü tebilemba alir Bangladesh nungertemi India nung dang visa bushir.



September 29, 2024 nü Haryana nung Jind district kübok Igrah yim dak Julana constituency nungi Congress candidate, Vinesh Phogat-i nüboyimdang tangokba noksa nung angur.





## TIR YIMYIM YIMOBILEM (EDITORIAL)

DIMAPUR TENTONÜ, SEPTEMBER (RONGJUI) 30, 2024

### Tenemtsüing lenmang to koda ?

**N**agaland nung tenemtsüing lenmang, Foothill Road, koba agi Assam den artsüsa aliba Niuland, Wokha, Mokokchung, Longleng aser Mon district-tem ajanga aotsüsa gari lenmang yanglutsü asoshi state government-i tatar senden nung tashi benoka jembir mapa kuma inyaka aotsüba sentong nung lateta ali, iba lenmang to shitak yangludar asü ano o to agi mapa mekümtet file nungang shibanga aliar temetnüsüka kümogo. Iba ama lenmang yabo nübortemi government dang yangludaktsüner ta ashitsüa menügdak, kechiyong nübortemi mashiyonga government nung alirtemi pei lima aser nübortem nungdakji reprangteta inyaksüla. Ajisüaka, Nagaland nung alir nübortema tanga state nung alir nübortem ama masü aser Nagaland state government-a tangar state government ama masü, government-i teinyaktsü ka meinyakyonga nübortemi kecha shishia mali ola madoktsü aser Nagaland government-ia nübortemi longkak aita merongshira kecha meinyaktsü, anungji Nagaland nungbo olaa maka aser mapaa maka ta tangar terenlok maparen ajak nung tejakleni aodang Nagaland-bo 20th century ta masü 19th century –i luadogo. Tangar joko tzü mopong memenen aser senotsüa aika meindok ser senzusenpongtsü aser taküm nungdak mapatem melamelaa inyaksü asoshi electric aser solar tashi nung gari aser train nung senzüteper saka asenokbo gari lenmang majungba agi tang tashi tokolak nung Assam nungi jangotsü bena chiyongteper. Aji oda, tanga chiyongtsütem abenbajibo yutsür school tanurtem anügdang chiyongtsü, mid-day meal, jang dena tokolak nung bena chiyongdaktsütsüba tia nung tanga district-tem nung dang masü saka Mokokchung district nunga Aor yimtsüing aika lir. Aji oda, akhidang Khristan yimsü arua arogo tenzükli tenla ki asütsü atema Assam len nungi yinjung aser kojaj ajak tokolak nung bena yangluba putu nungtosa asenok aika lir. Ibaji tanga mapa tulu meinyaktetba agi masü saka gari lenmang meyanglutetba ajanga lir. Aji oda, tangarbo tanü putu nung yangluba gari lenmangtem nung auyi aser lishi adoktsübajibo yutsür lenmang nungji ajem tsüka aliba den angutsüsa yanglur. Tetezü, gari lenmangji gari jajatsü atema dang masü saka state mera aser konang kuma yanglur. Ajisüaka, asenokbo gari lenmang tuluba aser tajungba kuma yanglutsüba otsüjibo yutsür lenmang tapok ateptsü dena nübortemi longkak aita ola madokra government nung alirtemibo gari tetsüing tulu temelem aketba gari nung window dang jungjunga shibangerbo lenmang majung nung atashiba aser gari raksaba timtem aser takoksa ajakji aremzükteter. Tenemtsüing lenmang yanglutsü atemabo, talisa, Dimapur nungbo nübortemi peisasa timtem aser nüngsen tulu agia longkak aita mungogo. Iba olaji angashir government-i tenemtsüing lenmang yanglutsü asoshi mapa inyaksü sentong yangluba aser sen lemsükba osang tajunga angashio. Ajisüaka, tangar state-tem dang nungi balaka Nagaland nung inyakba talila kaji, tenemtsüing lenmang nung yabo lenmang tama masü apu tama yanglua semzükba mapa to asütsü. Iba ama sentongtem jagi, tanübo asenok lenmang tajungba aser tatsüba asütsüba foothill road, Mariani-Mokokchung road aser Amguri - Mokokchung road, Mokokchung-Tuensang road-tem mekendoka lenmang talangbalen senzür. Ano, lenmang talangbalenja kecha balaka ajungbo masü saka tanga lenmang maliba agi senzütsüsa akümer. Iba tia ya odangbo masü saka asenok nübortem shisaramaba agi lenmang to yanglur asü meyanguar ta asügdangtepa jembitsüa meratetter. Aji oda, shisarama nungji asenoki lenmang tajung nung jajar asü tamajung nung jaja-ar memetetter. Shisarama nungji, ashiko, tang government-i asenok nem gari lenmang tajung yanglutsü nungbo khen election nungjibo sen mamshitsüa akok ta asenokibo bilema alitsüa akok. Iba amaji ka shisarama mesüi lira, foothill lenmang toa khen reprangdangtsüla aser asenok joko electric train nung sen aser mapang kangabo meindoki asen lima nung senzütsüsa, longkak ait nung dang inyaksür süra, longka aittsüla.

## OLEMSABANG

“Arogo tenzükba otsü ajaki agizüktettsüsa telemtetba ka agitsüla” Tir Yimyim adok 23, 24 September 2024, 0 lepla yamai agütsür

~ MOLUNGKIMONG LITERATURE BOARD

Ao lima mezüing osang tajung aruba nung sendakba otsü anogo ana tashi Olemsabang nung züluba nguogo aser iba nung tangatetba yamai lemsateper.

Arogo otsü dak sendakba court nung keno agüja aliba ‘withdraw’ asütsü atema ABAM Sanen Luden ajanga Molungyimsen Arogo nem anaben tashi temepishiba shiti agüja asügdang, saka parnoki par nokdakba nung masetshir aser tanü tashi yangji nokdaka lir. ABAM nung tanü toklang tenzükker aser tekolak komiti nung alirtemji yimdong kazür ama asenoki mebilemli. Parnok tsükdaktsü mesüra metsükdaktsü item ajaki nguyaa alitsü südi ta amanger, kechiyong ABAM nung teka amuoka inyakerteri Lim Arogo 169 tiptema aniba aseni angur. Rev. Dr. E.W. Clark-i tenzükba aser yangji sannüker inyakba arogo nung ABAM-i shilem magibaji ozü tangatetba nungbo, Rev. Dr. E.W. Clark temulong shiranga masü saka pa kanga pela alitsü ta amanger. Molungyimsen nung Rev. Dr. E.W. Clark-i Arogoji 1876 küm October ita ang tenzük. October 24, 1876 nung yim aküm aser Arogo tenzük, Mission Center mesemtet ta parnoki March 19, 2011 nung longpak tulu ka nung zülur azünga likaji yamala nungjia khen khenbo sakloka repring nung jungla. Ano ABAM-i shilem magibajia ABAM temzüing (Revise) 2016 ABAM nükla 2020-2030 aser Sanen Luden lemtet 19th March 2020 nung ajemdaker shilem magi. Iba lemtet ajakji Lim Arogo temzüing ta rajemtsür. O jembitsü mapang magütsü ta nüngsen o jembir, saka ABAM dak sendakba keno ajak Sanen Luden ajanga telemtetba agitsü, Sanen Luden-i metembangtetba keno kar lira Inti Mongdangi abentsü, ta temzüing nung akang-akanga zülua likaji koda.

1986 ABAM Special Komiti report Mongdangi table süa ayo, iba nung Mongdangi resolution No. 40 nung yamai lemteta lir, “Komiti osang bener aruba ama Mongdangi agizüka ayo, aser iba keno nung Mongdangi shilem kecha magitsü ta lemtet.” Iba nungi angateter resolution No. 40 nung Mongdangi lemtetba amaji par caseji ‘demerit’ amai ajiteter aser kanga jaraloka jembitsü lenmang mangur.

22nd December 1872 nung nisung 15 tzü nung baptija Kibuba benjong agia Molungkimong nung Arogo tenzük, iba oji Tsüngrem tenyar Rev. Dr. E.W. Clark pa teka agi züluba documents ji lir. Ibaji shingaia nunga ta ashitsü makok, iba sülen zülubaji documents masü nisung sangrusangchi o ta angatetang. Otsü aser kaket kuli nungji tamanger aser mamanger meyoktepba yim tasenji aküm ta kuli angur. 22nd December 1872 Arogo anapronglai amshitsü temeden kar ta L. Kika Pongeni paper nung zülü. Molungkimong yimji alinung dang Molungyimsenji lir. 24th October 1876 yim tasen kuma aonü pa Molungkimong identity samadok aser Molungkimong nungera ta ashitsü makok. Molungkimong nunger nüngtem aser maangka (Title and Privileges) nungji Molungyimsen nungeri raktepa jembitsü aser bilemdangjang ta ashitsüji alima tsügdang kanga taktsü mapa lir. Iba otsü, ABAM aser NBCC ajak Molungkimong nung 22nd December 1872 nung amendaka lir aser ibaji rakzüktsü aser rakteptsü makok. Court nung ABAM anema keno benokbaji Molungyimsem Arogo, iba case nung Molungkimong nunger maden, anungji Molungkimong yim tenüing tetetshi. Yisu Khrista Bethlehem nung aso, anogo ishika lirbo kinü Yisuji danga limai bener oadok. Pa alima balala nung lia jaja, ajakji 1st Bethlehem, 2nd Bethlehem ta mezülur aser mejembir saka Yisuji Bethlehem nung aso ta otsü meteter ajaki zülur aser kena atener. Molungyimsen nunger den telok ajaki tangatetep kati arutsüji mapang süiadokogo, ibaji tamakoktsü aser shilua bener marutettsü südi. Tebu aser techir na kodanga anogo ka nung asoba otsü mali ta rajemer. Molungyimsen Arogo küm 100 benjong, 125 benjong 1876 nung ajemdaker among, kanga makmanüi 150 benjongbo 1872 nung ajemdaker among. Temok-raok chir ajep manen ama par dak keta alibaji “First” ajak par dang sünür, iba jagi ABAM mangmangdaktsür ta angateti. Molungkimong nungeri titleji sadanger Molungyimsen nunger nem kodanga magutsütsü aser melemsatsü ta sangoktsür.

**Iba Olemsabang nung lemsaba ken-o aser shisatsü ya iba ocet züluri bilemba ken-o ama tazüngeru angateta agitsü mepishir**



## Khristan denomination ajak longjemtsü NEBF senden nung bangjem



Bengaluru nung National Ecumenical Bishops' Fellowship (NEBF) senden nung adenertem tangokba noksa nung angur.

**Bengaluru, September 29, 2024 (Agencies):** September ita tomle India tesem balala nung aliba Arogo 20 nungi lenir 40 shi Bengaluru yimti nung adenshia National Ecumenical Bishops' Fellowship (NEBF) senden menogo; iba senden nungji lenirtemi Khristan denomination balala ajak longjema alitsü aser India nung Khristantemi ajangshiba tebilemtsü onük balala atema longjemer inyaksü jembia liasü.

Catholic Bishops' Conference of India (CBCI)-i ayongzükba sendenji Bengaluru nung aliba St. John's National Academy of Health Sciences nung amen, aser iba senden nungji Catholic, Orthodox, Protestant aser Evangelical denominations nungi lenirtemi shilem agi.

CBCI Tir, Archbishop Andrews Thazhath leniba nung iba senden amen aser CBCI Office for Dialogue & Ecumenism nung Chairman, Bishop Joshua Mar Ignathios-i okila jembia liasü.

Iba senden tembangba sülen parnoki külem sangdong ka ajanga India nung Khristantem densema nütsüng ajema alirtem anema inyakba kanga bulua akümiba atema tebilemtsü akar, ta metetdaksü.

Parnokisa Khristantem densema nütsüng ajema alir temeden balala wazüka ayutsü aser kümzüksü atema inyaksü nüngdak, ta bangjem.

“Linük yangertsü atema Arogotem aser Khristantemi inyakba onoki sangdongner aser Khristan yimsü ya bendanger yimsü, ta züngshiba ya tai ratetba lir, ta onoki

angattetdaksüner, kechiyong Khristan yimsü ya India nung küm 2,000 jungogo,” ta sangdong nung shia lir.

Khristan lenirtem jagisa state level nung mapang shia ecumenical federations senden amentsü, national ecumenical federation of churches tentettsü aser iba nungji putirtem aser denomination balala nungi tekolakpurtem züngoktsü atema bangzüng renem.

Parnokisa Dalit Khristantem nem-a linük temzüng kübok kasa temeden agütsütsüla, ta takhangba agütsü aser 2025 küm Ecumenical federations longjemer Jubilee amongtsü bangjem.

Kasa senden nung o lemtepa dak alia Khristantem longjema alitsü atema sarasadem aser lokti chiyunga sentong tembanga liasü.

## Iran-Armenian nunger pastor Anooshavan Avedian jail nungi chiok



Pastor Anooshavan Avedian

**September 29, 2024:** Iran-Armenian nunger pastor ka küm 10 tepuokdak ayutsü obendang agütsüba sülen jail nung puok, ajisüaka küm ka shi dang lirbo tan hopta jail nungi chiokogo.

Arrshi küm 62 pastor, Anooshavan Avedian-i agütsüba temepishiba ken oji Tehran Appeal Court-i agizükba sülen pa idangyongjisa chiok, ta Iran nung yimsü temeden atema inyakba Khristan melungtet telok Article18-i metetdaksü.

Tamalen Iranian-Armenian nunger pastor ka, Joseph Shahbazian chiokba anogo nung pastor, Avedian jail nung puoka liasü.

Iran nung taoba Tir, Ebrahim Raisi aser pa melenzüksang, Masoud Pezeshkian nati New York semdangba mapang ka nung Avedian chiok.

Article18 nung Director, Mansour Borji-i, “Anooshavan anogo ka danga jail nung amongbaji tim masü, kechiyong pai ozüng alema kecha meinyak. Pai timtem ajangshiba atema pa nem temenok agütsütsü onoki imlar,” ta metetdaksü.

2020 küm August ita nung intelligence agent 30-i Tehran yimti kübok Narmak area nung pastor Avedian'er ki mita aoba sülen pa apu.

Revolutionary Court of Tehran indang Brach 26 nung ken o angadanga aruba sülen court-i Avedian küm 10 tepuokdak ayutsü obendang agütsüba liasü.

“Avedian-i linük security raksatsütsüsa ozüng alema telok ka tenteta liasü aser Islam temeshi yimsü raksatsütsü atema shisaiok agütsüba den

külemi tiyazü osang prok,” ta court-i pa aija liasü.

Court nung obendanger, Afshari-isa, Avedian indang house church nung züngsem ana- Abbas Soori aser Maryam Mohammadi nata aitsü. Soori aser Mohammadi na dangbo senchi dang achiba den külemi lokti aser yimtenren telok kecha nunga madentsü tuyu saka pastor Avedian bo küm 10 tepuokdak ayutsü obendang agütsüba liasü.

Evin jail nung amongba mapang nung Avedian kanga reshikangshia liasü aser asüngdangyaba mapang nunga kanga mezüngmeshia liasü, ta Article18-i metetdaksü.

United Nations Human Rights Committee-i Iran dang yimsü temeden benshiba atema tepuokdak yua alirtem ajak chioktsüla, ta aiben takhangba agütsüba aruogo.

Tang Iran nung Khristan 21 jail nung lir aser parnok rongnung 10 bo Evin jail nung lir. Iran nung Khristan nütsüng kanga arener, aser iba ya Islamic sorkar atema amokmeren ka lir, ta sorkari züngshir.

Tang alima nung Khristantem reshiakangshiba linük tamajungtiba 50 rongnung Iran ya jenjang 9buba nung lir (Open Doors USA's World Watch List).

## ANOGO ABEN TSÜNGREM DEN

### Tepela aluruba

- T. Ken 126: 1-6.

Iba ken ya 2 chubatem 19 aser Isaia 37 nung Tsüngremi kechi inyak iba nungi agiteta zülu, kodang Hezekia, Yihuda nung chuba alidang Sennacharib aser Assyria armyi Yirusalem lungpang, Yihuda nunger chiyongtsü asoshi kümzüksü nüngdaka liasü, kechiaser tsükchirtemi lemanj ajak nokdang Yihuda nunger chiyongtsü mengui liasü. Parnok alu rui aotsü mokoki liasü. Tsük senti liasü. Nüburtem kümzükker külen kodang parnok alui ao, parnoki telemtetba ka agi. Parnoki tsükji pei tanurtem atema amshitsü asü, mesüra proktsü? Aluyimertemi ajep kechiaser parnok tsük ali nung proktsü aküm(t.6). asenok ajak metsü proker aser tarurtem lir.

Tepela aluruba akatsü asoshi asenoki kechi inyaksüla? Mezüngbuba, osangtajung metsüji prokang. Laishiba nung kuli asüba noksa aika lir (2 Kor.5:20, Zek.3:2; Matt. 4:19; 5:14). Osangtajung agi nüburtem atongbaji alu ayimba mesüka lir. Iba nung amalitep nungdaker, Kechiaser kari proker aser kari arur. Na aluruba nung shilem ka asü?

Aluruba asoshi nai sarasademang. Kümzüka malir asoshi na tanü ajebtsü akok, saka kenü na pelatsü (Gal.6:9). Shirnoki osangtajung proker parnok tepela alururtem asütsü. Tanabuba, ne rongsen Tsüngrem sentsüwangshi asoshi prokang. Asenoki prokba asenoki arutsü( 2Kor 9:6-11). Nisung aikati tamagitsü nung pei rongsen lalur. Missionarytemi teyari atar, arogo ulushitsü arogoi teyari atar. Asenoki mokuri prokra asenok tepela alururtem asütsü ta Pauli ashi.

Tesembuba, Tsüngrem Tanela Temeshi prokang (Gal 6:6-8; 5:16-23). Asenoki ya koda inyaksü? Asenoki Tanela mapatemji asen mulungjang nung ayutsüla. Kodang asenoki Tsüngrem o nung shisadangdir (T.ken 119:11), asenoki Tanela aluruba arutsü. Temulungjangji atsüki ka mesüka lir, anungji asenoki aji repringtsüla. Aji temulung meyipba. Temeshi alitsü mapang agiang, sarasademang, o nung shisadangang aser metsüji ne mulung nung remang.

Tanü nai inyakba ajakji aremer; metsü tajung arutsü jangjaang.

## Burkina Faso nung Jihad kiralongartemi Khristan 26 tepset

**September 29, 2024:** Burkina Faso linük nung anogo ana Khristantem tekülem sentong tsüngda Islamic kiralongartemi agiba mapang nung Tenla ki ka nung Khristan 26 kiralongartem iba tesem jagi terok zü rangdangja tepsetba aruba sülen Khristan 26 lisü agi densema nisung aika tepsetogo, alenba aser terok zü rangdangtsü, ta pastor kati metetdaksü.

August ita tatembanglen Barsalogo aser Sanaba jila na nung kiralongartemi Khristan aika tepset, ajisüaka iba osang ya tawa ang Khristan melungtet telok Christian Solidarity International (CSI)-i sangdong ka ajanga metetdaksü.

Kiralongartemi Barsalogo jila kübok yimtsüng nung alirtem amakba sülen anogo ka lir Sanaba jila nung aliba Protestant Arogo Tenla ki ka amakdang Khristan 26 tepset.

Barsalogo jila nung army tetuyuba kübok yimdaklirtemi par yim kümzüksü atema ongken tua aliba mapang nung kiralongartem ajungbena iba tesem jagi aru. al-Qaeda kiralongrar telok den sendaktepa aliba Jama'at Nusrat al-Islam wal-Muslimin (JNIM)-i, iba yimdakji nisung 400 jungnüa tepsetogo, ta metetdaksü.

Anogo ka lir sülen August 25 nü Sanaba jila nung aliba Christian Alliance Evangelical

Arogo Tenla kidang Khristantem tekülem sentong agiba mapang nung kiralongartem iba tesem jagi aruba sülen Khristan 26 lisü agi alenba aser terok zü rangdangtsü, ta pastor kati metetdaksü.

Barnabas Aid teloki ashiba agi, kiralongartem jagi tetsür-tanurtem aser teburtem bendangba sülen teburtemji terok zü rangdangja tepset. Iba sülen parnoki ki rongdoktsü aser kiset shiruru aika auyar ao. Kasa tatalokba nungjisa kiralongrar anabo parnok mekümdangba agi improvised explosive device (IED) bomb ka apokba lendong nung asü.

Sahel region nung kiralongartemi timtem agütsüba ya 2012 küm Mali nung mezüng tenzüka liasü, iba sülen tanga linüktem nunga prokshi. al-Qaeda aser Islamic State den sendaktepa aliba telok aikati sorkar atsüngdokba sülen Islamic yimsüsüba amenoktsü meranger.

Burkina Faso nung 2023 küm kija nunga kiralongrar telok balalai nisung 8,000 shi tepsetogo. Tang linük litsü shilem 60 bo ozüng alema inyakba telok balalai azioker.



**AO OSHI ANGAZÜKDAK:**  
**TANÜ ANGAZÜKTSÜBA OJANG**



**Tango**

(n) teni tebang nungi adokba mopong (breath)

\* Tango sashi tashi asenok taküm alitsü.

**Tangok**

(v) noksa agiba (photo shoot)

\* Tanü lokti sentong nung noksa aika tangok.

**OLONG PAITEP # 6939**

1		2				3		4		5
				6						
	7		8							
9					10			11	12	
			13		14	15				
16					17			18		
				19	20					
21		22								23
24										

**TIPLÉN**

- 1. Saku - (4)
- 6. Songjen - (7)
- 7. Mail/Tazung - (4)
- 9. Tasen apok - (6)
- 11. Songtem - (3)
- 13. Ata liasü - (5)
- 16. Tzünglu den külemi tsüker - (3)
- 17. Aso tila - (6)
- 20. Tashi maküm - (4)
- 24. Tenüng kasa jatepba - (7)
- 25. Ki yangluba oset - (4)

**LANGTSÜNGLEN**

- 1. Taksep - (3)
- 2. Langtem - (5)
- 3. O tamendaktak - (4)
- 4. Nütsü tebuba - (3)
- 5. Anüngdang tesangwa - (3)
- 6. Apitet - (5)
- 7. Yagi jungdaksür - (4)
- 8. Anogo semer ka - (3)
- 10. \_\_\_ tatsü - (3)
- 12. Tebur kidong aser zünga kasa tsüngda jatepba - (4)
- 14. Pela agizükba tapu ka - (5)
- 15. Tenüng atet - (3)
- 18. Mejanga onü - (5)
- 19. Talak techira - (4)
- 21. Maneni - (3)
- 22. Nübo teyi - (3)
- 23. Meshi - (3)

**OLONG PAITEP # 6938 TELANGZÜBA**

**TIPLÉN :**

- 2. Pongsen, 5. Lepko,
- 7. Omen, 8. Maongka,
- 10. Yangkhu, 12. Senpong, 14. Angu,
- 15. Raksa, 16. Arameso

**LANGTSÜNGLEN :**

- 1. Alimang, 2. Pongen, 3. Samaru,
- 4. Nün, 6. Pio, 9. Nüngdak,
- 10. Yongya, 11. Kongro, 13. Ora,
- 14. Ata.

**NAI-A YA METETTER MA**



Bangladesh tsür Sumaiya Khan-i Chopsticks agi jang tejang 37 achiba atema Guinness World Record ka yanglutetogo.

Sumaiya Khan-i minute 1 tsüngda jang tejang 37 achiba ajanga alima otsü tasen ka yangluogo. April 2022 nung Stanford, California nung Teland La-i minute ka nung jang tejang 27 chiteta otsü tasen ka yanglua liasü saka ibaji Sumaiya Khan-i ajatetogo ta Guinness World Records-i metetdaksüogo.

**Manipur nung lanur anati video nung tena kümzüksü mepishir**



**Imphal, September 29, 2024 (Agencies):** Kuki telungpurtem apub ta temulung melemi bilemba lanur ana indang video ka social media nung prokshir aser tenati Manipur Chief Minister N. Biren Singh dang teyari meshir.

Iba video ajanga nisungtem aoksateper aser tenati CM Biren dang 'jabasotem' ama bilema tena pur aoertemi ashiba angatsü video nung mepishia lir. September 27 nikongdang 3:00 ako meta lanur asem SSC GD recruitment test atema New Keithelmanbi-i aodang len

tom nung sama. Parnok kinungertemi par asem den tongtepratep mesüeteti aküm saka Leimakhong nung mapa lemezüka aliba Army-i Ningombam Johnson Singh ta ser par asem rongnung ka kümzük.

Army-i N. Sanjoy'er jabaso Ningombam Imphal West Police ket nung agütsü.

Ajisüaka lanur ana- Oinam Thoithoi Singh aser Thokchom Thoithoiba Singh na tanü tashi mangur.

Tena kinungertem kanga temulung shiranga aliba mapang ka iba video ajanga tamajungba

kümdaktsüogo. Tena ya Kuki telungpurtem apuba ama video nung sayua lir.

Iba atema Thoubal Khekman Jila Keithel nung public senden ka ayonga amen aser idangji Joint Action Committee (JAC) ka tentetogo.

JAC-i Thoubal District nung Deputy Commissioner dang lanur ana kümzüksü atema shidi ka zülüogo.

Iba shidi agütsüba sülen Peace and Relief Committee Convenor L. Subol-i Additional Superintendent of Police (SP) den ajurutepa tena kümzüksü atema olemtepogo.

**Assam Rifles-i Rs 52 crore alang Yaba süngjang lakh 2.60 apu**

**Guwahati, September 29, 2024 (Agencies):** Tripura kübok West Tripura district nung Assam Rifles sepaitemi Yaba süngjang lakh 2.60 puogo.

Iba indang jenjang ya international market nung Rs 52 crore shi alang lir.

Osang tejangja ka angazükba sülen Assam Rifles

sepaitemi gari ka nung Yaba süngjang bena aliba apu. Gari nung drugs ji polyvinyl chloride (PVC) floor mats nung alepanger bena liasü.

Ya ba (crazy medicine) ya methamphetamine aser caffeine meyoktepa drug ka lir aser taoba nung yama (horse drug) ta aja.

Yaba süngjang ya Southeast Asia nung kanga bulua amshir aser sentsü red, pink, orange mesüra lime green nung yanglur.

Alima nung methamphetamine teimtiba yanglubaji Myanmar lir aser Yaba süngjang teimtiba Thailand nung yanglur.

**Assam sorkari lanur entrepreneur nem Rs 75,000 agütsütsü**

**Guwahati, September 29, 2024 (Agencies):** Assam nung lanur entrepreneurs 25,000 shia nem state sorkari Rs 75,000 agütsütsü ta Chief Minister Himanta Biswa Sarma-i ashi.

September 30, 2024 anepdang 10:00 ako nung Veterinary College Field, Khanapara nung sentong ka nung parnok nem sen mezüngbuba shilem agütsütsü. Iba ya Chief Minister's Atmanirbhar Asom Abhijan

(CMAAA) nung shilem ka lir aser Assam nung mapa manguba khuret ajemtsü aser lanurtem rongrong entrepreneurship ajungkettsü nükjidong nung tenzüker.

"Iba scheme ajanga onoki lanurtem pei sasa liteta otettsü tashi agütsütsü aser senotsü agütsüba den training aser market access agütsütsü" ta CM Sarma-i ashi.

Entrepreneurs-i PAN cards, Aadhaar cards mesüra

government-recognized photo ID cards amala kulikaket tejangja bener arutsüla ta pai ashi.

Chief Minister's Atmanirbhar Asom Abhijan (CMAAA) atema Rs 510 crore lemezükja lir. Entrepreneur shia nem mezüng atema Rs 75,000 agütsüba sülen parnok industries dak sendakba nung anogo asemnü training tembanger ano senotsü teyari talila agütsütsü.

**Agartala Railway ketdangsürtemi ozüng alema arur 5 apu**



**Agartala, September 29, 2024 (Agencies):** Railway Protection Force (RPF) aser Government Railway Police (GRP) külemi mita aodang tetsür ka dena bendanger pungu apu.

Agartala railway station nung ketdangsürtemi Bangladeshi nunger ka den

Rohingya nunger pezüji apu. Par pungu ya Tripura nung India-Bangladesh arrtsü adena aitba sülen apu ta Agartala railway station GRP nung Officer in-charge Tapas Das-i ashi.

Bangladeshi nungbaji Sukur Ali ta jangjaogo aser pa Comilla district nungi lir. Rohingya

nungerji Amir Haqil, Yasmin Akhtar, Md Tareq aser Md Ulla nunger ta jangjaogo.

Par pungu ket nung kulikaket kecha melii ozüng alema Tripura-i aru aser idak nungi Chennai, Gujarat aser Hyderabad-i aotsüba sentong liasü ta OC Das-i ashi.



## Nepal tüzümsüng aser alinen nung asür nisung 100 alemogo



**Kathmandu, Rongjui/Sept. 29 (Agencies):** Nepal nung tüzümsüng aser alinen agi nisung 100 dak tema süogo aser aika samar lir, ta ketdangsür temi Deobarnü ashi.

Himalayan linük nung yimtsüng balala nungi osang aruba ajanga asürtem ya timba akumtsü ta angateter, police-i Deobarnep ashi.

Bus ana Kathmandu-i aodang iba yimti anasa highway ka nung alinen alua anembangba nungi Honibar aonung nisung tasümgang 14 nguteta lir. Linük yimtiba, Kathmandu densema linük tesem balala nung iba alimar lendong ajurua aliba nübürtem kumzüksü atema security personnel 3,000 dak tema den helicopters aser motorboats tem Honibarnü yok. Kathmandu nung nisung 34

asü, aser Deobarnü iba yimti-i aoba lenmangtem ajunga alinen agi anembangba liasü.

Iba linük aser South Asia nung June nungi September ita tashi meyi tüzünglu aruba ajanga küm shia nisung asür aser ki o jen raksatsür, saka tüzümsüng aser alinen ajanga nisung asüba tang tali kumogo.

“Samar aliba nisungtem ngutetsü aser kumzüksü atema police temi danga agency aser nübürtem den külemi inyaker,” ta Nepal indang National Disaster Risk Reduction and Management Authority nung odongtar Basanta Adhikari-i osangbener dang ashi.

Truck anishir kati ashiba agi, pa aonung metzü meshi kimai aludang tüzümsüng ya pa indang tapubang tonger liasü. “Kü indang truck ajunga tüzü

agi metsüngbangogo,” ta Hari Malla-i ashi.

Hokulbar nikongdang nungi Kathmandu nungi aoba domestic flights ajunga athiba ajanga iba tesem nungi tayimtsü 150 dak tema aotsü aliba nung kongshi. International flights bo tang tashi senzür, ta Kathmandu airport indang odongtar Rinji Sherpa-i ashi.

Tesem 28 nung alinen agi highways anembangba sülen police temi jana indoka lenmang tem tanaben lapoktsü meranga inyaktar, ta police odongtar Dan Bahadur Karki-i ashi.

Tüzünglu ya Deobarnü tashibo arutsü akok, ta Kathmandu nung tüzümsüng-mopung takzür ketdangsür kati ashi.

“Tüzünglu tesashi ya Deobarnep tashi arutsü amai lir aser iba sülen tüzümsüng tera ajungtsü,” ta Binu Maharajan-i ashi.

Küm shia India anüdoklen Bihar nung tüzümsüng kanga sashia adodaktsüba Koshi River ya ‘danger level’ dang temaba nung ayimer, koba Nepal southeast tsütsü lir, ta ketdangsür kati ashi.

Tzümopung melenba ajanga Nepal nung tüzünglu tali arur ta mongin temi ashir.

Taküm tüzünglu dak sendakba lendong nung nisung 170 dak tema süogo.

## South Africa jila ka nung nisung 17 khaset

**Lusikisiki, Rongjui/Sept. 29 (Agencies):** South Africa nung jila ka nung anasatepa ki ana nung tetsür 15 densema nisung 17 tepset, ta police temi ashir.

Temulung melemi alirtem bushiba mapang lir, ta national police odongtar Athlenda Mathe-i Honibarnü sangdong ka nung ashi.

South Africa southeast tsütsü Eastern Cape province kübok Lusikisiki jila nung iba lendong ya Hokulbar aonung ataloka liasü.

Police temi video prokshiba nunga nisung khasetba ya kiyong ka nung ki ana nung ataloka liasü, koba jila tezülen rural homesteads alidak lir.

Ki ka nung tetsür 12 aser tebur ka khaset aser ano ki ka nung tetsür asem aser tebur ka khaset, ta police-i ashi. Tetsür pezü, tebur ka aser ita ana kinü tanur ka kumzük.

Küm ka jakdang tepsetba tetsü aser jala mang ayimtsü asoshi adenshia lia iba lendong ya atalok, ta ashir.

Parnok ya iba anogo atema chiyongtsü, aser sempet renema mapang Hokulbar aonung atalok ta ashi.

Police minister Senzo Mchunu-i Honibarnü osangbener senden ka nung jembidang, detectives aser forensic experts tem yoka lir, ta ashi.

“Iba tatalokba bushisüngdanga mapa tamajung inyaker aputsü atema yoka alirtem dak onoki tamang akar. Par saka bendanga magütsüra onoki onok sasa bena arutettsü,” ta Mchunu-i ashi.

“Par nükjidong onoki memetet aser lendong agütsür ya nisung ka kija asü parnok aika aliar memetet,” ta national police chief Fannie Masemola-ia ashi.

Nisung 62 million aliba linük, South Africa nungya taküm küm tenzüker mezüng ita trok nung nisung 12,734 tepsetba lir, ta police indang official crime statistics ajanga ashir. Ibaji anogo ka nung nisung 70 dak tema tepsetba amai adoker. Item tatalokba nungya prangbong agi tepsetba timba lir.

Küm ishika mass shooting ya tali kumogo, aser mapang kaka nisungtem pei kidang lia khaseter. 2023 küm April ita anasa KwaZulu-Natal province nunga ki ka nung tetsür tenet aser ita 13 teburchanu ka densema nisung ter tepsetba liasü.

South Africa nung prangbong amshitsü ozüng ya sashia lir, saka ozüng agi memelai amshiba, register masüba prangbong tem amshiba nungi timtem tali adoker, ta ketdangsür temi ashir.

## Nasrallah tepsetba sülen Israel-i ano Lebanon nung tesem balala amak

**Jerusalem, Rongjui/September 29 (Agencies):** Israel military-i ashiba agi, Hezbollah lenir Hassan Nasrallah southern Beirut suburb nung tepsetba sülen parnoki Lebanon kübok Hezbollah pur amendaka aliba tesem balala makogo.

Bekaa Valley kübok Ain jila anüng ajang amakba sülen nisung 11 tepsetogo, ta Lebanon indang National News Agency sangdong ka ajanga metetdaksü.

Israel military-i Deobarnü ashiba agi, parnoki ano Hezbollah ketdangsür tongtimbang Nabil Kaouk tepsetogo. Hezbollah puri Nasrallah ya Hokolbarnü Dahiyeh tesem nung tepset ta jangjashitsüba sülen ano tang Israel-i Nabil tepsetba indang metetdaksüogo. Iba telok aser Israel na October ita nungi rara arudar aser tang Nasrallah tepsetba ya parnok asoshi takoksa tulu lir.

Gaza nung Palestine nung pusama Hezbollah puri Israel dak rocket tem khaloktsü tenzüka liasü. Parnoki Gaza nung rara anen nungdang arrtsü adena Israel amakba anentsü ta tenangzükba agütsüogo.

Israel military-i Deobarnü Telegram messaging app ajanga ashiba agi, parnok indang air force-i taoba ghonda ishika

tsüngda Lebanon nung kiralongrartem amendaka aliba tesem ishika makaogo, kong iba telok indang prangbong injang aser hadir balala rizünga yua liasü.


Al Jazeera osangbener Imran Khan-i southern Lebanon kübok Marjayoun tesem nungi ashiba agi, Tyre governorate tezülen jila tila ka nung civil defence centre ka amak aser iba mapang nisung pezü tepsetba den nisung aika yirua liasü.

“Iba fire service unit ya kechiba mejeta amak iba indang tasüngdangba aika adoker. Iba ya Islamic Scout Association dena sendaktepa lir. Iba ya community centre ka lir,” ta pai ashi.

“Manger mesangwa tsüngda southern Lebanon nung anüng ajanga tesem aika amakba onoki nguogo. Israel-i tanen makai makdar,” ta paisa shisem.

Israel-i ita 11 tashi Gaza taochi makai tanen maka arudar aser ita ishika arrtsü adena khatapa aruba sülen parnoki Hombarnü nungi Lebanon amak tenzüko. Hokolbarnü Nasrallah tepsetba ajanga telok ana tsüngda mangatetp tali kumogo.

Ministry of Public Health-i ashiba agi, Israel-i anüng ajanga Lebanon amakba sülen Honibarnü nisung 33 tepsetogo



Hassan Nasrallah

aser iba ya bendenlokra taoba hopta nungi Hezbollah pur tamendakdak amakba mapang nungi 700 dak tema tepsetogo.

October 8 nü nungi tang tashi nung Lebanon nung nisung 1,640 tepsetogo, kong tanur 104 aser tetsür 194 densema lir. Asürtem ya timba Israel-i taoba hopta ana tesem balala amakba mapang asüba lir.

Nasrallah, shiba lenisüba nung Hezbollah pur küm 30 dak tema inyaksangshia aruogo, pa tepsetba ya Israel-i tang tashi nung takoksa balala bener arutsüba nung par telok asoshi takoksa tulutiba asütsü.

Al Jazeera osangbener Zeina Khodr-i, Beirut nungi ashiba agi, Hezbollah atema iba ya temelenshiba mapang ka lir.

“Hassan Nasrallah-i office mapa kecha bener meliaka pa ya Lebanon nung ajak dang tashi taitba nisung ka liasü,” ta lai ashi. “Hezbollah puri prnok

indang command aser control structure manokshi-i lir aser parnok lenirtem maneni inyaksangshiteta lir ta ta kuli agütsütsüla,” ta laisa shisem.

Israel-i parnoki ali ajanga Lebanon amaktsü akok ta metetdaksüogo, kechiyong army tekolakba Herzi Halevi-i Honibarnü, par sepaitem tarutsü atema renema lir ta ashiba den Lebanon nung dang tekümzükba bushia jena aotsü metetdaksüogo. Israel-i bomb pokloktsü tenzüka sülen Lebanon nung million ka shi southern Lebanon toktsür jenaogo.

Nasrallah tepsetba sülen mezüngbuba jembiba mapang Israel Ato Kilonser Benjamin Netanyahu-i ashiba agi, tang Lebanon den arrtsü nung aliba northern Israel atema rara nükjidong ana lir.

Mezüngbubaji north nung Israel nungertem jila aser settlement balalai meyipa anir arutsüba lir. Tanabuba ji north len arrtsü nung tashi liromedema kümdaktsütsü asoshi lir, ta Al Jazeera osangbener Hamdah Sallut-i ashi.

“Israel nung ketdantsürtemi Honibarnü tepeyong Hezbollah aser parnok indang military tashi raksatsütsü asoshi parnok mulungteter lir ta shiogo. Israel indang chief of staff den Israel

indang Defence Minister Yoav Gallant-i, north nung Lebanon amaktsü atema tasa tasen yangluba agizükogo,” ta Sallut-i ashi.

Kasa mapang nung United States tir Joe Biden-i Honibarnü ashiba agi, ceasefire benoktsü atema mapang tongogo.

Rehoboth Beach, Delaware nung osangbenertemi Israel-i ali ajanga Lebanon amaktsü aliba paitoktetsü mepaitoktetsü ta asüngdangba mapang Biden-i, “ceasefire benoktsü mapang tongogo,” ta langzü.

Maneni Temerem tüzüim nung US indang warship missile amshia amakba atema US-i telangzüba agütsütsü magütsütsü ta asüngdangba mapang pai, onoki telangzüba agütsüdar ta langzü.

Hokolbarnü Yemen nung amendaker aliba Houthi teloki Israel kübok Tel Aviv aser Ashkelon yimti amakba aser US indang Navy warships asem missile aser drone amshia amakba metetakja liasü.

Houthis puri November ita nungi tenzüka Israel kübok yimti balala aser Temerem tüzüim, Gulf of Aden aser Bab al-Mandeb Strait nung Israel den sendaktepa aliba rongtem maka arudar. Gaza nung Palestine nung pusama temaittsü parnoki iba jenjang agia arudar.



### Junior World Championship: India nung shooter temi gold 2 angu



**Rongjui/September 29, 2024 (Agencies):** India nung shooter temi Peru nung ISSF Junior World Championship (Rifle/Pistol/Shotgun) kanga junga tenzuka tetsür aser tebur 10m air pistol team event nung gold medal ana nguogo.

Junior team asayar Umesh Choudhary, Pradhyumn Singh aser Mukesh Nelavalli nungeri 10m air pistol tebur team tetoktepba nung point 1726 ngua parnoki gold medal angu. Parnok tanabuba jenjang nung tembangba Romania team dang nungi point 10 agi timba liasü aser kasa mapang nung Italy team-i point 1707 ngua parnok tasembuba jenjang nung

tembang. Ajisüaka kija asaya nung Choudhary final asaya atema menor aoba ajanga point ana ajemtsüba sülen medal angutsü maongka aliba magitet.

Choudhary aser Singh na kija asaya nung qualification round asayaba sülen tasembuba aser pezübuba nung final-i ia liasü. Choudhary-i point 580 angu aser Singh-i point 578 angu aser kija asaya nung medal monguteti trokbuba aser tibuba nung tembanga liasü.

Iba asaya nung Romania nung asayar Luca Joldea-i gold aser Chinese Taipei nung asayar Hsieh Hsiang-Chen-i silver medal ngua liasü.

Tetsür 10m air pistol team

asaya nung India tsür Kanishka Dagar, Lakshita aser Anjali Chaudhary nungeri point 1708 ngua gold medal nguogo. Parnoki silver anguba Azerbaijan team point ka agi aser bronze medal anguba Ukraine team point 4 agi koka liasü.

Kija asaya nunga Dagar-i point 573 ngua tasembua jenjang nung final-i ai aser Kanika-a pongububa nung qualify süa liasü.

Final asaya nung Kanika-i point 217.6 ngua bronze medal angu aser Dagar tibuba nung tembanga liasü.

Chinese Taipei tsür Chen Yu-Chun-i gold aser Slovakia tsür Manja Slak-i bronze medal ngua liasü.

### FIFA-i Club World Cup 2025 asayatsüba tesemtem sangdongogo

**Rongjui/September 29, 2024 (Agencies):** 2025 FIFA Club World Cup final New Jersey nung asayatsü, koba NFL nung New York Giants aser New York Jets indang home ground lir, ta FIFA-i metetdaksü.

FIFA tir Gianni Infantino-i iba osang ya Honibarnü metetdakja liasü.

Iba asayamung nung tang nungibo team 32 asayatsü, kong alima ajunga nungi club tajungtibatem toktepba angutsü. Iba asayamung ya United States kübok tesem balala nung June 15 nungi July 13 nü tashi asayatsü.

Iba asayamung atema asayaba tesem 12 amshitsü aser item rongnung West Coast nungbo ana dang lir aser aji Los Angeles anasa Pasadena nung Rose Bowl aser Seattle nung Lumen Field asütsü.

Iba asayamung ya regional CONCACAF Gold Cup asayaba mapang asayatsü, koba West Coast nung timba asayatsü.

Final atema shiba iba open-air stadium ya 2010 küm lapok aser iba stadium nung nisung 82,500 asemstsü. Iba stadium nung 2016 küm Copa America Centenario final asayaogo aser 2026 küm FIFA World Cup final-a asayatsü.

Tanga tesemtem rongnung

Mercedes-Benz Stadium (Atlanta), Bank of America Stadium (Charlotte), TQL Stadium (Cincinnati), Hard Rock Stadium (Miami), GEODIS Park (Nashville), Camping World Stadium (Orlando), Inter&Co Stadium (Orlando), Lincoln Financial Field (Philadelphia) aser Audi Field (Washington, DC) densema lir.

Club World Cup nung FIFA indang continental confederations shia nungi title abenba team temi shilem agiba angutsü.

Iba asayamung atema draw December ita asütsü aser asayamung atema team 32 rongnungi 30 bo qualification inyakym ajanga shimatokogo.

Europea nungi team 12 rongnung Real Madrid, Manchester City aser Bayern Munich nung densema lir. Parnok den Argentina nungi River Plate aser Boca Juniors aser Brazil nungi Flamengo nung densema lir.

Taoba Club World Cup nung team tenet knockout format nung asaya aser final Saudi Arabia nung asayaba mapang Manchester City-i, Brazil team Fluminense koka liasü.

FIFA-i, iba asayamung ya küm pezü nung khen asayatsü sentong lir, ajisüaka 2029 küm kong asayatsü iba indang ano mejangja.

### Bangladesh den T20 asaya atema India team sangdongogo



**Rongjui/September 29, 2024 (Agencies):** Ajit Agarkar-i aniba selection committee-i, Bangladesh den T20 asaya asem asayatsü aliba atema India team nung asayartem tenüng sangdongogo.

Team nung Sanju Samson züngoksemogo, ajisüaka Ishan Kishan bo meshim. Pa melen T20I team nung Jitesh Sharma shimogo. Rishabh Pant aser Dhruv Jurel na maliba mapang second wicketkeeper atema asayar ka shimtsü nüngdaka liasü.

Rishabh aser Dhruv na ya Bangladesh den tang asaya aliba Test squad nung densema lir. Tena New Zealand den asayamung nung maneni asayatsü. India-Bangladesh

T20I asayamung ya October 12 nü tenzüksü aser India-New Zealand Test asayamung October 16 nü nungi tenzüksü lir.

Asayar shimertemi tang mezüngbuba express pacer, Mayank Yadav team nung züngoksemogo. Right-arm pacer yagi IPL 2024 nung Lucknow Super Giants nungi asayaba mapang ball kanga kara aonba ajanga ajak atsüa arua liasü. Iba season nung Mayank asaya pezü nung dang asaya aser iba sülen yiruba ajanga masayatetsüa aküm.

Mayank-i tang tashi nung first-class ka, List A asaya 17 aser T20 asaya 14 asayar lir. Pa India team nung züngoksemer asünung pai Harshit Rana ajateta iba asayamung nung

India team nungi mezüngbuba asayashitsü akok.

Asayar shimertemi Yuzvendra Chahal-a meshim. Pa ya 2024 T20 World Cup akokba team nung züngoksema liasü saka iba asayamung atema meshim. Chahal melen Varun Chakaravathy shimogo, shiba küm asem sülen India team-i meyipa aruogo.

Chakaravathy, mezüngbuba 2021 küm Sri Lanka nung oa asayaba mapang asaya liasü. Pa T20 World Cup nunga asayaogo, saka iba sülen meshimi liasü. Pai IPL 2024 nung kanga junga asaya-a wicket 21 agia liasü.

Iba asayamung nung captain Suryakumar Yadav nem teyari agütsütsü atema vice captain ka malitsü, kechiyong Shubman Gill anisüngzükdaksüogo. SL den asayamung atema meshimba sülen Abhishek Sharma team nung züngoksemogo aser Nitish Kumar Reddy-a meyipa aruogo.

Bangladesh den T20 asayamung atema India team: Suryakumar Yadav (Captain), Abhishek Sharma, Sanju Samson, Rinku Singh, Hardik Pandya, Riyan Parag, Nitish Kumar Reddy, Shivam Dube, Washington Sundar, Ravi Bishnoi, Varun Chakaravathy, Jitesh Sharma, Arshdeep Singh, Harshit Rana, Mayank Yadav.

### Rodri season tepiyong masayatetsü: Pep Guardiola

**Manchester City, Rongjui/Sept. 29 (Agencies):** Manchester City asoshi taküm season talangba asütsü, kechiaser midfield nung asayar mongin Rodri ACL yiruba ajanga season tanüngba nung masayatetsü, ta Pep Guardiola-i sangdongogo.

Manchester City ya Premier League nung Newcastle den asayatsü anogo ka lia Guardiola-i iba osang ya sangdong aser Spain nungba ya taruba season matong tashi masayatetsü ta ashi.

“Rodri tanep ACL aser meniscus kar surgery agi. Rodri asoshi iba season tembangogo. Pa yaritsü onok yangi lir, aser kasa mapang dangar asayar ajunga lungjemer Rodri melen asayatsü,” ta Guardiola-i ashi.

“Taruba season nung pa yangi alitsü.”

Deobarnü Premier League nung Arsenal den asayadang minute 16 dang asayar Rodri achichi temokok yirua liasü.

Spain nung international sapang nung asayasang ya nüktzü yima tetsüng adoka took

aser pa melen Mateo Kovacic anioka asaya.

Pa yiruba ya mezüng bilemba dang nungi tamajungba liasü, ta Spain nungi osangtem ajanga ashir. Yiruba sülen temang tendangba nung arishi küm 28 tain ya cruciate ligament raksa aliba ajitet – koba pa aser City fans asoshi taoksatsü osang ka lir.

Rodri ya City indang defensive midfield nung mongin ka lir aser aruya aliba Ballon D’Or nung contender ka lir, anungji pa maliba ya par telok asoshi takoksa tulu asütsü.

Ajisüaka City boss Pep Guardiola-i pa dak teimla akaba lemsatapa liasü.

“Rodri ya tasü tait nisung ka lir,” ta Gunners den 2-2 draw asüba sülen Guardiola-i shia liasü.

“Pai langka meshidak lir ta bilemba yong asayadak moapu yutsü. Aji masünungbo Rodri-i asayala. Alima nung midfielder tsütsü pa ya tajungtiba lir, Ballon d’Or akoktsü teimla alir. Pa kanga tongtipang. Saka ya atalok.”

**BILEMDANGANG**  
 “Pai taküm ya tangar asoshi tatishitsü tajung ka asütsüla.”